



六瑩堂二集卷之三

南海梁佩蘭藥亭著

龍眠方正

玉鶴洲編

武林翁嵩年蘿軒訂

南海廖

煇南暉校

七言古

端州訪硯歌

端州石工巧刷硯刷就水巖少人見水巖東洞石
最好豆綠青花暗生面收藏人家太珍惜百金未
許求一片裹以豹囊襲重錦對客捧出手屢戰我
來欲訪無處訪石室山菴問將遍石工有時持入
舟大半頑塊無滑柔意欲魚目混珠子豈有蛾眉

同宿窟此石廣州四時有堆積直等山與丘聖人
不貴難得貨獨此取重同天球儒者風流在文采
少有亦足誇壯遊憶昨來時值冬月泮河水涸見
石穴日月星辰射其缺蛟龍蟠伏洞門戶鬼神扃
鏑嚴斧鉞思得五丁挾斧斤爲我入洞窮毫末上
至天根下山骨天地光華盡洩發圓之如環小如
玦歸我匣中歎奇絕草檄不用磨盾鼻賦詩萬首
始歡悅

送吳采臣大叅歸天門

大船峩峩映江水小船戢戢銜鵲尾木蘭爲楫紫

絲竿瞬息一夕行千里借問使君何以然嶺南四
月楊梅天南船順風向北指篙師不用橫索錢同
人祖帳臨河甸素馨花開照人面酒後誰能賦別
離東飛伯勞西飛燕憶公昔日來五羊帥漕旌節
生輝光諸軍任取據礪礪計相自足供滎陽擎雷
山頭碑千尺至今人比韓陵石采葛人家紀姓名
珠官風俗流恩澤蘭也山林養拙人閉門久矣存
其真聖賢貧賤古恒有不願干謁隨風塵自從客
歲虔州路一見新知遂成故况復登臨上越臺車
馬班班過蓬戶讌會招尋月幾回如澠美酒傾金

杯乘槎獨去汎滄海探梅屢約臨西臺蕭寺春深
海棠睡銀塘歷亂飛紅翠寂寞南園二百年風流
社事還相繼長歌贈我知我心平生寫出成連琴
龍蛇法書遍尺幅隻字價等雙南金黃鐘喤喤蘊
高厚郊廟之音到林藪曲高和寡理則然投桃報
李吾何有荔枝可食不肯留梳榔夾路聞鈎輶陶
情或做阮公詠倚杖豈作盧敖遊馬首庾關數延
佇歸去天門對誰語予亦秋來泝秣陵夜月高吟
問牛渚

贈于子先學使

君不見華不注芙蓉天半神仙住又不見鈞突泉
飛流五色成紫烟濟上山川稱第一大風颯颯盛
人物往時七子推滄溟南樓雪照蓬萊青今時瑯
琊樹旗幟祭酒司勳萬夫避使君夾轂同齊盟江
人黃人不敢爭珠盤玉敦捧在手欲左者左右者
右百斛之鼎垂龍文筆端舉起流氤氳昔在西曹
法星冷太白秋高擊鷹隼一爲奉禮躬上班不時
玉佩朝龍顏帝遣文昌作司命三浙人文入金鏡
嶺南倏覩臨旌旄魚龍變化騰風濤合浦明珠能
解取海中盡斲珊瑚樹我曾五度遊燕臺梅花落

盡梨花開漁洋官齋把詩卷思君不見愁空遠豈
知今日來蠻鄉轅門一謁喜非常十年心事始得
慰况讀新篇美清製平生落落寡所親天地生我
爲閒人少小雖爲大人賦老向青山坐煙霧那能
整翮排長風揮斥八極開鴻濛嗚呼男兒貴在行
胸臆閉戶著書真可惜

賦得白雲草堂歌贈丘曙戒大理

君不見長安巍峩標地軸九重天上開黃屋仙人
玉露注銅盤帝座甘泉動華燭周環甲第盡侯王
貴戚豪門各自當處處樓臺通內苑時時歌舞學

平陽冠蓋繽紛御堤上去馬來牛不相讓共傳金
冊遣詞臣復道沙堤候丞相淮南先生冷如冰一
官大李執法星卜居深巷掩花竹白雲往往垂戶
庭白雲來遊不復去先生作堂教雲住因憶淮南
親舍存安得白雲飛其處芙蓉爲裳薜荔衣我來
堂上不忍歸先生酌酒勸我飲飲醉西山橫翠微
人生隨地須行樂莫用無繩空自縛走熱終憐赤
阪山耐寒還是紇干雀彈棊擊筑臨高臺角聲入
夜邊風來燒燈待月月未出仰天大笑天河開緬
昔先生渡瓊海化外黎人風俗改桄榔菴下遍題

詩付與珠娘歌款乃武昌乘傳凡數年滇黔巴蜀
方烽烟牙旗鎧甲日閃爍麥田雉壠仍安然漢時
長孺稱臥治先生才大真餘事文章久矣玉堂人
鐘簾原爲天廟器卽今劔佩朝紫宸朝回花底香
氤氳白雲之情自舒卷白雲以外無見聞我歸羅
浮軒轅宅天鷄夜半觀海日薊門回首望白雲欲
見先生焉可得

珠湖草堂歌送吳萬子歸秦郵

江南二月天氣暖草長鶯飛雜花亂薊北風嚴尚
未柔貴人衣著銀鼠裘百花四月始滿眼房山牡

丹衆驚歎豐臺芍藥更絕倫金盤玉盃堆紅雲吳
郎過我日相約出郭看花倚花酌西山縹緲墮畫
圖此身恨不飛雲孤忽然語我珠湖去家本珠湖
最深處草堂湖上閣四時湖光萬頃吹琉璃芳烈
芙蓉遶湖屋夏涼不用思寒玉閒來抱膝讀我書
大聲遑遑駭龍魚有時移船釣湖口夜半星辰落
吾手東鄰嘈嘈壓糟牀西鄰獵獵炊稻香菰蒲冥
冥聽射鴨綠樹陰陰喚鷓鴣就中景色同麻源人
來訝爲角里村妻能織綃女蠶繭小兒學問工文
選人生快樂得似君眼前富貴何足云君歸珠湖

我留滯我欲作歌懇天帝君才豈可長珠湖我也
京國胡爲乎明日騎驢亦南返山中耕田猶未晚
宋牧仲比部招同蔣京少錢介維暨其次公
山言豐臺看芍藥予與京少先至不相值少
憇塔院寺遂入中頂登九蓮臺而還宋東以
詩依韻奉答三首末一首專贈京少以京少
曾在豐臺三宿也

右安城頭星照瓦官街鼓打憐長夜城鷄咿喔人
始行早出城門赴花下宋公有約胡不來獨遶紅
泉竹根瀉蔣侯騎馬忽相值半揖金鞭立林亞天
生我輩長閑人日車容易羲和借且近花前仰花
色花神喜我我拜謝白玉爲盤列雉田紅雲如蓋
團僧舍飽看勝啖杏花粥渴解無用江東蔗鳥雀
窺人恣往還蝴蝶黏衫少驚怕此中樂事難具陳
霸陵醉尉那能罵

東豐西豐踏花路馬蹄自曉行入夜長安卿相空
滿城無有一人至其下先生好遊獨早出松風夾
道驚濤瀉邀予賓客蔣與錢有男好手推流亞珊
瑚筆架翡翠牀準擬分題不須借愛花我欲就花
死摹花公等真陶謝誰知花林竟相失執鞭我似

避三舍由來大將張
大旗小技材官徒
舞蔗側聞詩成呵寺壁
風雨颯颯鬼神怕
取紅取白原女兒
百遍桃花咒成罵

名花有似傾國色
相對恨不連日夜
繡袷初臨綺日前
寶鞍擬解華星下
鉛華并汲者誰子
琥珀轆轤隔花瀉
道花無語却有情
扶鬚抱萼交頭亞
春光九十逾八十
今日何惜一日借
不見艷李與穠桃
前蹊早已紛紛謝
花開香鬢散天女
復湧金輪訝耶舍
氣味真成蒼荀林
根株好是瞿曇蔗
潦倒花前我不辭
斜風吹去教誰怕
翠袖紅筵舞鳳凰

不值黃鸝數聲罵

君家愛花真大雅
相過花龕竟三夜
花晴花雨總不言
祇布氍毹坐林下
香氣空濛錦繖圍
露華的歷金莖瀉
黃衫少年誰比數
紫玉佳人差同亞
世入賞花空任耳
君有兩目非人借
牢籠花態寫入詩
一字花翁一稱謝
九疊芙蓉眺玉臺
一條冰澗穿山舍
猶自高吟不離口
滋味沙糖本霜蔗
碧霞仙宮衆祇肅
龍象蹴踏驢所怕
金犢車回細馬來
羅裙畏見春風罵

永光寺寓齋同朱悔人
宋山言醉後放歌限

鹽字韻

平生懶舉酒知已相對却不嫌百杯痛飲可立醉
一醉潦倒隨厭厭浮雲凝空亘四望入夜不見星
墜簷燈花磊落照几席豈有好事來相占我從離
家八閱月客舍長日糊藥奩思歸苦未稍朔馬整
鬪要欲同飛鷁南溟水深波浪闊二樵峰峻巉巖
尖乘槎好去汎牛斗歷磻任意腰刀鎌釣竿拂珊
瑚閒釣得海蟾飽飯留青山赤米兼白鹽膝上彈
瑤琴架上抽牙籤鴻濛以前是何物歌咏太古追
黃炎自適頗謂野馬野傍人竊笑潛夫潛誰能在

長安干謁面目成黑黔低頭拜公卿欲語不敢妨
人箝男兒志氣塞天地舉動瑣細真悶閣今夕何
夕得此樂蕭寺息影神安恬忽然論風雅險韻同
鬪拈朱侯汝詩成掌握藏珠鈴一字欲易千龍纁
宋生微吟下勾簾八音播金石五味諧酸甜予亦
取材樸斲求梗楠棟宇承椒風宮殿充飛廉宋也
摩腹朱歎髯予獲左右頻頻瞻此時雨歇階地白
屋角月吐光微纖蒲牢鐘聲肅清聽僧梵流響風
揭襜我輩矜琳瑯寂寞誠用砭綺言艷語不足道
佛前請共叅楞嚴

送宋山言歸商丘

北土雨少夏日亢祝融執炬如南荒火龍張鬣地
軸橫叶桑乾河流成沸湯冰車城門日相衝叶行
人賣冰如賣餠叶人家冰盤充圓方予亦畏熱客
舍藏越山一髮青茫茫衡門滄海花扶桑欲歸不
能思徬徨仰視大小衆烏翔梁園公子神洋洋過
予自拂巾衫涼言出涿鹿辭帝鄉路從汴州橋金
梁還自商丘古睢陽第宅睢陽城中央迺祖衮衣
而繡裳賜書萬卷自先皇而翁法曹新裝潢帳列
甲乙森琳瑯歸去且乘夏日長弟兄誦讀同一堂

上下千古窮毫芒滌殷蕩周漂虞唐五經黼黻爲
文章百家雜碎皆粃糠有田帶郭千畝疆四時八
節供蒸嘗黍稷稻麥與菰粱宅邊園池遶周防牡
丹芍藥垂紫房蒂茄文藻青白蔣竹竿嫋嫋新折
將河岫玉鮪鱗鯉鱠釣爲賓客陳玉觴高秋九月
天雨霜射獵天氣鷹風揚白草滿地蘆葦黃黑狐
黃狐相跳梁角弓手挽三石強一發可落雙飛鷁
鐵絲箭鏃來銀麈銅盤刺血鮮淋浪生飲其血慨
以慷仰天大笑無四旁人生聚散無恒常今日一
別成參商後會不知其何鄉愛君詞賦誇鳳凰願

君聞闔排文昌歌以送君抒我腸君讀我歌莫我忘

驄馬行送任希菴視長蘆醜政

庭中有廐槽有粟驄馬驕嘶歎沙玉奚官紫髯善
法相顧謂天骨無俗肉繡衣使者辭九重詔令騎
出朝門東龍髻鳳臆見姿態蒲梢尾捲桃花紅橐
駝牛羊散在地一見驄馬行者避鴈磧嚴驅九月
霜鷹風靜肅千林氣控來驥裏不動塵導以旌旆
承華茵郊迎父老遮馬拜驚歎天上歛麒麟長蘆
涼風直沽月魚鹽人家萬家悅火井長流鯁海烟
銀沙細湧鯨波雪東屈渤海南大梁驄馬所至神
骨張恍然閭闔下文駟儼若瑤圃騰飛黃桑乾河
水明碣石秋色晚送君驄馬行馭馭予亦尋歸白
板船江洲且飽蓴鱸飯

送汪舟次檢討出使琉球

今皇御極朝元殿玉帛車書萬方遍西北明駝獻
鐵門東南翡翠供奇甸往時白雉來交州荷蘭亦
進小肉牛朝廷賞讌有殊禮遠人拜舞歡懷柔七
閩之東落際海大小琉球在其內方物曾將入貢
圖臣人久矣登王會聖王德化無垓垠日月所照

同乾坤冊封盛典有故事帝用簡在咨儒臣儒臣
出使君恩重黃門宣詔車徒送碣石秋高祖帳橫
交河水滿官船動帆檣一指生長風天地蕩蕩歸
胸中已見蛟涎吹浪白還驚魚眼射潮紅重溟汎
去不知處倏爾連連露洲渚烟消始達梅花洋雲
開直映鬪鏤樹停船鼓吹揚旌旗帕頭諸喇爭傳
知番兒來窺負刀劔國王出逐騎熊羆一時奏樂
魚龍震金函捧讀天顏近山北尼芝錫綺文山南
察度頒銀印丈夫得志推人豪身著天使麒麟袍
仗節西域窮塞外豈似滄海行波濤風俗山川列
爲記太史採風因其事萬里扶桑掬日迴殿前應
上琉球志

大唐雷氏琴歌

并序

張晴峰水部從燕市上得古琴斷紋斑然膠漆
解散欲脫屬吳門張生亮輔修之開腹見大唐
雷氏斲五字驚爲雷琴遍徵海內諸名士爲詩
請予作歌

大唐名琴韜古色燕市風塵少人識張侯好古雅
博物此琴遂爲張侯得攜歸几席春和融爪甲一
赴生祥風邊沙塞磧見草木深堂奧室聞魚龍珊

瑚屑雕紫鸞尾鍾山玉綴九寡珥吳門名工重拂
拭剖腹果有雷氏字膠漆解散仍合回千年古斷
松鱗開迺知神物在遭遇世間何代無奇才

送高固齋還閩

與君握手在帝都賦詩飲酒無日無公卿坐上忘
菰蘆醉後擊碎紅珊瑚傍人笑我爲狂奴君也道
德人楷模標格霄漢秋雲孤巾箱自藏五經圖夏
侯伏生真其徒海棠芍藥紅錦鋪看花過門輒相
呼馬蹄踏踏行春蕪秋風忽然吹雕胡思歸月下
閒據梧取道過飽松江鱸潞河斟酌共放舟誰知

先後成分途昨者值君南旺湖小牒撇捩如飛鳧
後來待君住丹徒十日不見望眼枯今夕何幸來
姑蘇得抒懷抱同歡娛燈花磊落照鬢鬚野匏酒
清香滿鑪可惜良會清夜徂明明離別仍踟躕君
從雲溪入桐廬木奴花映雪色初仙霞之關霞染
裾予亦長江萬里泛舳艫秦淮渡口迎檣烏豫章
城外停斯須還家羅浮四百三十二峰頂有松可
種茅可誅煩君寄我空中書

典裘歌爲余佺廬中丞賦

并序

癸亥二月閩帥北旋吳船絡繹數百里載之以

行舟人以道遠請益糧適中丞以按事入淮欣然解身所衣狐白裘歸質庫以應之予時客吳目擊其事作歌以備採風

海外扶桑挂弓箭南軍北指如旋電瓜步洲沿下瀨軍桃花水遶長江練艚艫萬翼連檣烏吳兒捩柁爭喧呼官家給糧自有額豈知道遠愁前途狐裘蒙茸坐淮上草木山川盡欣向是誰浥注成江河能使舟人失惆悵中丞以德及下民耳目所到卽施仁典裘一事亦偶耳此念已足垂千春况乃江南蒞來久風俗驕奢變深厚潔白長持冰雪心更張屢出雲雷手大人心中爲天下憂細故焉肯爲身謀閭閻匹帛儘易煖漢陽枉用珍鷄裘我歌典裘歌一曲歌罷山青水深綠紀事無妨越客吟稱詩可當吳風錄方今聖人升明堂九州萬國瞻垂裳我公本是仲山甫會須補衮山龍旁

留別魏禹平

蜀客抱孤桐空山發高調宋人服章甫適越反見笑遨遊天下何所爲結交欲得新相知黃金萬鎰不足數意氣一合山可移自從與君共握手天地悠悠話長久蕭寺春深到海棠玉河雪霽看楊柳

君騎疋馬出并州揮鞭直指吳門遊闔閭霸業已
陳迹賦詩尚寫吳宮秋我念天南客天北身非駕
鰲飛不得琉璃廠東傍西舍落日送君情脉脉嚴
冬吹沙塞草枯南還我亦來姑蘇幕府逢君語夙
昔燈明香清觴玉壺醉來起舞鐵如意眼底使君
與孤耳我年衰老君尚強不信寥寥寡知己君家
祖德樹遠長有明一代扶綱常黃門之忠庶常孝
至今稱述猶芬芳學使文章復無價玉尺金繩約
天下君爲天驥爲飛黃虎脊龍文皆其亞丈夫遇
合自有時看君刷秣騰天墀予也還家釣滄海蛟
龍待上虹蜺絲洞庭五月楊梅熟憶得荔枝滿溪
屋黃禾如雲映耕犢田家處處歡播穀節物驚心
劇可憐別君歸去動經年應懷越國羊城客明汎
吳儂鴨嘴船

題朱生小影

九峰峩峩插天半笠澤微茫浸雲漢雲烟絲聯互
變換清泉白石明玉粲先生神明自澡灌松風吹
來衣帶緩躬抱道德常燕衍顧視塵世駭鴨亂方
朔歲星誠戲玩

題何生小影

軍裝袴褶袍紫茸綠皮寶刀青芙蓉禿鶩毛毬帽
生風虎睂大顙玉頰紅顧盼突兀無軍中看君儒
者真英雄幽燕少年好使氣白日圍獵夜抱妓黃
鷄向波鷹立臂蘆葉吹起塞天地吁嗟乎若曹豈
識天下事

送陳仲夔歸松湖

君家松湖屋我家仙湖樓兩湖相隔六千里空涵
一氣同清秋其中日月星辰落湖底沐浴吞吐光
欲浮琉璃萬頃作詭譎堆出城郭疑銀州林壑草
木變異色照耀鮮濯香而幽魚龍宮室復無數雷

雨鼓動驚陽侯就中亦有舴艋舟金沙鷓鴣雪片
鷗楊柳芙蓉種湖尾石房書屋臨湖頭居湖之樂
有如此君家松湖更難儔瞿塘五月峽水至虎鬚
一倒沉豪牛江漢之大爭飛流天地浸灌不可收
漁人刺船來沔口取錢買魚真良謀嘉魚似玉玉
幾尺銀鱗雪鬣光油油霜刀作鱠絲縷細宜城美
酒兼可求君也兄弟相唱酬慈母玉杖杖白鳩上
壽進酒傳觥觥齊僮楚彈吳女謳祝鼓琵琶琴坎
篥北堂沿湖綺紋疊金萱滿幹銀葉抽湖松日夜
盤蛟虬松下與客彈文楸君也樂事亦已優我念

仙湖歸不得登高望遠徒雙眸日泉月泉夾湖嶼
湖波灩灩泉泚泚珠江入城與湖合睥睨倒影湖
中流湖上黃木灣湖下翡翠洲素馨花田近湖屋
几案吹入香巾幃有時白龜朱鼈舞浪遊虎門捲
潮來勢集萬弩千戈矛扶胥化作紫泥海紅盤湧
日飛金毬家人望我回湖月幾度垂銀鈎誰知欲
行反夷猶羨君飛旆如飛鷺北方嚴寒著貂鼠我
寒且著青羔裘送君騎馬出白溝尋常少別已相
念况乃一別經歲周我生凡事只任運文章千古
夫何尤一官老大意亦足但不爲巧爲棘猴君年
方壯茂遠猷翰林詞賦動天子歷時聲譽驅曹劉
三生石事自記取聰明冰雪良有由始爲老生萬
卷破不出蓬藿徒探搜復爲閩人少登第疏劾權
相英氣適黔陽遣戍地北極出入虎豹啼鶴鷗龍
池劫灰會有盡此意冥付乾坤留至今清源古寺
在廬岳石壁彩翠林木稠楊循何人作導引大慈
攝受吾欲投得無頭陀金色具妙相袈裟角濕隨
傾湫蓮花香海示幻泡居向坎井原蛭螭卽今平
原射獵鷹臂鞬少年博陸呼采斝笳吹城上葉卷
喉眼前各各不相侔與君並馬聊綢繆君行我住

心悠悠幽州雪暗衡岳霽歸去湖鳥鳴啾啾吾亦
何時得歸嶺上格磔聞鞦韆仙湖芳草青可採仰

天四顧歌四愁

老生閩人効權相成黔陽北極清源古寺比丘楊循俱仲夔三生事

留別王勤中次送行原韻

一到吳中曷胸臆是處山川見盤鬱決漭浮雲絕
壑來昂藏野鶴寒沙立閭門銀簫入耳亂不比琵琶
動人泣愛君竹關長不開草堂待我真悠哉籬
邊野菊正堪把風霜之草隨根摧孤亭峩峩撫松
樹天與高人等閒住令弟初爲百粵遊嬌兒近學
五禽戲我家桄榔能作麪木棉能作衣山人笑我

胡不歸明當別君渡江返嶺海身駕鳥特無是非

留別郭臯旭次原韻

鶯脰湖頭一杯酒吳娘舉勸纖纖手欲移不移木
蘭楫欲折不折山塘柳平生歷覽頗好奇土風樂
處隨心期惜哉箭筈大如笛學射不及黃鬚兒以
此幽州去秋別尋君獨自來吳越紅柑白藕歡照
眼金管玉簫坐遲月直至春回畫裏行櫻桃花下
語流鶯南歸忽向炎州路翡翠飛飛無限情

東臯關壯繆廟新鑄大鐘歌

金精翕赭光氣榮赤燦紅焰分白青南方祝融驅

丙丁洪爐巨扇搖火鈴華鐘萬石鳧氏成銑樂篆
帶枚擗并象如錚于如神鉦躩踞猛簏懸兩楹帝
宮齋宿天宇清一擊一吼蒲牢聲宣達元氣騰空
冥摧懼羣魅朝百靈維帝在昔征不庭載行處所
轟雷霆威揚天轉招搖星奸雄魄喪不敢聽贅闍
貉子心膽傾北南吳魏悉削平力扶漢鼎勳屬擎
旂常日月同勒銘何況殿闕升苾馨銀鑄鐵鳳交
洪鳴噴薄忠烈通精誠六鰲地軸橫三城迷民無
耳無目睛劔輪湯護予予行忽聞帝座洋洋盈入
微出壯音砰訇警回芒蠢一旦醒曠然天地還清

明

惠州王紫詮太守築羅浮子日亭落成作歌
寄之

登山不到羅浮巔舉足萬里空徒然瑤房璇室七
十二羣真笙鶴長喧闐况支蓬萊一左股金陵地
肺遙相連風雲雷雨出其下上界漭沆涵澄鮮夜
來星宿照分野有若榆樹垂金錢齊州九點盡可
數中原一縷搖輕烟就中飛雲更奇絕天門誅蕩
雲聯綿金銀宮闕任變化幡舩杼軸無恒遷銀河
屈注倒在背帝座豁落平當前神霄斧鑿施不下

鳥道豈有藤蘿牽何人築亭在其上循州太守今
豪賢爲亭命名曰子日意象直探鴻濛先世間萬
事起根本黃鐘子氣無不全靜爲動本太極混河
洛理數非言詮陰陽旋轉推晝夜陽明玉燭光回
天紫薇垣中日杲杲太陰蟠竦安能纏此山三更
坐見日高與泰岱齊比肩天鷄大叫海水動海中
湧出金盤圓散爲琉璃燈紫紺千光破碎生紅蓮
羲和整轡升若木神人枉用迴秦鞭太守名亭復
爲記二樓伐石爲碑鐫大書年月人某某千秋萬
世名山傳附書仙人海瓊子倡和共掣雲霞箋平

生濟勝仗筋力匡廬白岳隨攀緣羅浮家山望咫尺
反似往昔遊幽燕山靈待我謝招手不久黃鵠
來高騫洞門借騎蝴蝶入峰頂或就麻姑眠煩君
鬪取龍葱七尺遺贈我相酬先寄飛龍篇

送方葆羽歸桐城兼柬其尊公依巖

天驥不與凡馬同神龍豈是泥淖中明堂古來重
梁棟宗廟誰不求鐘鏞自從見君燕山道兩世論
交與君好日下紅塵簇往來燈前白室杼懷抱愛
君意氣南山高劉生作俠非人豪胸蟠星宿列象
緯筆綴蠶尾窮牛毛雖然獻策未得志五侯七貴

知名字客舍無時不賣文大幕爲人上封事我時
忝竊爲侍臣金門索米徒苦辛疏乞歸山暫休沐
逍遙且作閒居人菱灣藕港移舟楫桑柘楓林近
相接漲海宵分泛斗牛羅浮天半騎蝴蝶蒼頭報
我空中音故人過訪丘與林寒魚負冰鴈帶雪隆
冬氣候成玄陰流連登眺不知去南國山川教人
住飲酒官齋玳瑁筵題詩僧院娑羅樹荔支熟後
蕉子黃近來柑橘紅有霜買船十日泊珠海長風
巨浪天茫茫夜潮風定星侵曉挂帆倏忽隨飛鳥
度嶺松看翠蓋垂當關驛指紅梅笑匡廬峰下水

連雲直至樅陽路始分鄉味盤飧薦蘆筍鱗鯉斫
鱠還紛紛趨庭再拜陳家讌龍眠一幅屏風見爲
道相思致八行豹囊裏寄羚羊硯

葆羽號鶴洲文
忠公諱以智孫

送徐子卿歸錢塘

炎州七月風蕭騷斗牛過伏天氣高海中終日作
飛浪勢如白馬乘銀濤君家錢塘江上住八月觀
濤衆如雨潮來直似捲鐵甲錢王枉用持弓弩我
曾一至當深冬江空不辨鼉鼉宮雪花密壓西冷
渡月色暗度南屏鐘聞君爲人不得見查侯陸侯
屢稱善長松臥壑寒到底魄濯冰壺上人面先人

大節留丹青君也高舉爲鴻冥當時橋山事慘切
龍髯不下誰爲迎杞人往往憂天墜漆室之女思
憔悴琵琶彈斷玉關塵杜宇啼殘蜀國事忽然策
杖臨越臺草堂訪我何奇哉逢君不禁開笑口一
日相見能數迴長篇贈我滿紙濕風雨淋漓鬼神
集黃河從天瀉萬里要與筆力爭出入當今作者
徒紛紛看君直似鴻門軍囊韃插羽佐驅使豈比
叱咤成風雲我欲隨君和一曲古琴游弦鷄登木
山盤水沓河漢長皎皎白駒在空谷今日斗酒歌
別離明朝伯勞東西飛踟躕獨立週四顧霜露入

夜沾人衣

長篇壽朱徽菴中丞

我昔登泰山嶒嶸踏黃峴上朝碧霞宮下俛蓬萊
縣三更鷄鳴日初出海水瀟蕩金盤見是時渾身
生羽翼仙雲飄動祥風扇歸向朱陵四百峰觀日
亦與青岱同飛雲之頂三千六百丈火珠旋轉光
鴻濛浮丘洪崖把我手晞髮共指扶桑東其間琪
花瑤草復無數獨少銀鱗雪鬣之秦松中丞降東
嶽夙昔表神異節鉞南方布至仁星精北斗斟元
氣騶虞踐履草木生都亭經過豺狼避燭龍銜日

無不至却笑軒轅鏡十二粵人何幸我公來百蠻
天地爲昭回地維八柱擎鼻屭天鼓一震行風雷
端然陰合而陽開珠旗高卓朝漢臺官僚肅清民
樂業鳥獸翔走魚曝腮萸桐一葉開正月上帝端
居在金闕羣真朝賀駮孔鸞我公崧高誦南越有
如皎日天中揭袞衣繡斧人懽悅待看補袞侍山
龍朝堂元老資黃髮

送吳山帶北上

金出赤堇始見精白虹繞氣爲玉榮驪龍領珠燭
滄溟糴賓牛鐸存審聲純鈎盤郢鷓鴣瑩鳳皇三

十六和鳴麒麟撼珮天馬寧崑崙萬里八駿程造
化蘊蓄含異靈造化一洩天下驚金茅山中有吳
生自寶康瓠名無名書擁四庫面百城升堂入奧
開重扃奮筆落紙飛雪輕音如洪鐘鏗長鯨河流
岳峙還淵停短歌微吟空草亭踪跡寄托榛與苓
餐霞中散自忘形蛾眉嫵媚誰目成昔爲里顰今
國傾應圖骨象顏薜瓊雙璜雜佩搖光晶金根爲
車載之行仲冬子月賦北征鳴笳疊鼓朝揚舲鼉
鳴順風潮水盈帆檣高揭懸蘭旌江頭祖帳何縱
橫離支美酒琥珀觥梅花馥馥上酒罌親朋舉勸

幾迭更相與痛飲同醉醒澆湟水合洽墨凌臺關
鳥道鑿五丁路出章貢連吳荆匡廬九疊芙蓉屏
香爐挂瀑素練縈天限南北爲金陵江淮黃河水
濁清北徐氣象猶崢嶸昔生劉項驅強羸至今人
物能談兵齊魯周道如砥平巖巖泰岱地軸擎耳
目所歷皆未經河朔勁悍幽薊并朱弓錦帶鞬臂
鷹馬蹄踏踏車彭彭桑乾河流帶斷冰太行丹嶂
朝神京我皇端拱臨殿廷詔擢天下真儒英龍門
洞達排九楹神魚燒尾經雷霆看君奏賦揚紫庭
雲和孤竹鏘咸莖上給筆札臣馬卿硬黃箋紙鏤

管青置身天上居蓬瀛翳予與君爲弟兄啟蒙鄉
塾俱弱齡咿唔乾死十秋螢壯操鉛槧約玉繩漸
老圭璧磨角稜貴賤一轍無所營偶然晚達任運
乘上帝主宰人豈能君爲文章鬱雲興仙湖之水
洗耳聽仙湖之水濯我纓再遊金馬隨鸞鈴與君
鼓吹當休明著作萬古昭日星

送石公之安南

古今以來最尊貴無上妙道稱法王紫金伽黎帝
青鉢眎諸所有皆糝糠上天下地只一指左顧右
鑒無四旁世尊拈花迦葉笑當時此事全昭彰有

何微密不可說智者自見愚者盲譬如月出始在
水水月不定江茫茫泊乎重輪薄霄漢星宿歷歷
朝中央風車電馬任選踏至靜一照窮毫芒卓哉
吾師杖人子洞源玉水來壽昌南華曹溪出西域
此水直與葱河長師爲循源更騰上屈注意欲橫
天潢少時圓明入寶鏡釋迦小字傳諸方中州註
書在嵩室少林祖殿洪鐘撞文殊五臺等閒住自
掃古雪煨折鐺長安說法動丞相獅子奮迅聞天
皇吳門松陵越茗雲踞席何啻十道場嶺中提唱
三十載所座是處成寶坊邇來安南慕玄暘國王

望拜抒中腸番文延請具金冊書曰某某恭而莊
國人齋戒遍城郭國王祇肅觀旛幢珠江水長未
拍岸虎門潮上千尺強吾師從容望洋海龍象夾
侍乘舟航舵工羅盤定針石天妃降駕鳴珠璫佛
燈盡結紫紺色水天四散琉璃光馮夷恬波示靈
異神魚張鬣隨竿檣珊瑚樹出雲淡施龍門江見
風低昂計程度近可三日此邦盼久如十霜到時
舉國人禮足王臣以下分班行其間貴種纏赤鬘
亦有少者騎白羊薔薇點地香秘醇蘇合代蠟燭
燦煌金鏡銀笙奏法樂寶華錦繖陞禪堂夜簾捲

起天豁落鈴鐸吹動金丁當大慈引導誰不懾威
神顯現邪自降重離神明第一義盤陀花落天風
颺其時聞者歎希有各各飽滿醍醐漿艾山花葉
亦霑灑鳳銜金汁來翱翔國王聞法復受記當空
卍字繇中藏維摩半偈悟可了楞伽一本書成倉
王宮供養陳百物襯錢堆積如山岡鬱泥自此用
鮫絹方丈何地非繩牀竺乾大法遍東土今日又
得流南荒從來緣合係夙契報本以果理則常就
如國中菴羅果若非舊種安得嘗師行乘春歸及
夏六月天氣多青蒼南風大發海水順海帆一排
如飛鷁明霞空中尚繚繞初日已上東扶桑依然
謁師在紅寺蘭苕烟際芙蓉塘海邦風土定有記
借予採入圖金箱作歌送師語不盡燈下黯慘心
彷徨但可懷袖當尺素慎勿取叶調宮商

送王虹友還吳門

珠江江水急如箭黃木灣頭掣雷電萬疊山橫半
幅帆風濤撒旋飛銀練禺陽瀆陽兩高峽百丈長
年不須牽嶺南春暖氣候殊山木江花總深舊鷗
鳴聲從草裏出錦翼斑斑撲如扇卽看水長五婆
城篙折灘迴亦乘便雄關天半人往還蟻垤蜂盤

磨中轉憶君昨歲秋日來大火西流節初變荔支
龍日雖未嘗朱橘紅橙已堪羨後來甘蔗糖有霜
細骨嘉魚並登薦客舍尋君問故人官閣開尊設
筵宴城頭吹角行欲鎖燭爓裁詩待呈遍君爲長
句真絕倫山東李白今重見海內羣推王太倉競
乞龍蛇寫箋絹嗟予欲屈過草堂累月經營未酬
願君行不肯爲我留那得留連更郊餞吳門舊遊
心繾綣送君歸去何繇卷江南二月生白蘋橫塘
到處花光泫雉尾新萼滿湖澱洞庭包山恣游衍
同人相過慰遠遊索讀新詩共稱善我有羚羊玉
一片青花絕勝紅絲硯發墨十手可對面贈君大
雅志不忘莫似東飛伯勞西飛燕

送史蕉飲太史歸維揚用顧書宣編修原韻

閒身日伴蓮花僧筆墨結習羞畫蠅放開六合止
方寸我自適我忘人憎高歌痛飲計亦得天地跼
躄夫何曾有誰同心復同好錯以白玉繩朱繩洪
鐘猛簾在宮廟所向叩擊無不應夫君九霄一鸞
鳳下界夢澤無神鷹泰山蹴踏峰破碎黃河指畫
冰峻嶒往時休沐歸邗上馬總六轡書十乘儒臣
博洽有如此上帝簡在寧醉嘗蓬萊仙都敞金闕

憶昔忝竊同時登君留長安盛車蓋姓字龍腹羣
相矜而我蹭蹬學驅策母乃處士徒虛稱南歸以
來今七載絲髮如雪頭顱增青山未許便穩臥仰
天尚擬垂天鵬豈知寒芒舊星鏐埋泉一斷終難
騰賴君來遊相過我知我湖嶼安無能傾盤供客
僅蝦菜舉益儲粟無數升還從湖心及湖尾船舷
晒網時挑罾平生磊落縱不減少壯意態何由興
炫花幸不上日曉削骨畢竟生眉稜長談往往當
日落兩人共對空房燈家童丁倒任鼾睡僮約瑣
細那堪懲三更夜深月初吐琉璃堆地光層層衆
聲寂寞羣動息萬慮滌蕩凡思澄都忘語默入神
室紅盆不久浮陽升瓜棚豆格墜牆角照來疎密
藤鬚髻君猶琅琅誦詩句追琢金石連高朋作詩
和君志君厚篋出繭紙呼兒謄

又疊前韻

曹溪學者吾師曾梵夾貝葉書秋蠅清淨於此得
法喜繁華不涉而誰憎釣絲萬丈探大海海底果
見蛟龍曾九州八極騁四遠周天之尺同一繩珠
盤在手敦在坳自有捧劔來相鷹卑者行蟻向大
磨高者攫肉成鞬鷹堂堂豈必盡豁落嶽嶽豈必

皆峻嶒錦衣綠幘盛貂珥黃旗赤纛交駮乘上天
若不予日月下土終作迷民膏人生富貴各有命
玉皇僊籍原難登愛君少年列侍從聲色不動亦
不矜明堂制作推瑰璋大內姓字爭傳稱依然蕭
散若林下翰林祿秩無一增北歸屢整雪中騎南
遊忽值雲際鵬蠻花歷亂犀象隱蜃氣噴薄魚鱗
騰約君羅浮共觀日乘風縱體吾猶能與君城南
共觴讌長筵揖讓階而升黃柑可擘霜落瓜嘉魚
可薦漁出曾更同微吟按宮徵忍禁潑墨波濤興
黼黻施繡分雜組瓊瑤琢石磨紫稜當今海內論
風雅譬如老衲談傳燈扇子舉起便讚歎禪牀擊
碎無勸懲幻中作滅滅復幻浮屠何止高七層大
人規格不在此當空萬里雲清澄九鳥射盡羿亦
死扶桑突兀紅輪昇江河莫怪言放浪冰雪誰管
頭鬢鬢對君辭意此傾寫他時肯憶吾老朋借君
秘書閱未了燈下急遣人抄謄

與送史萬夫歸維揚仍用前韻

有序

予以巳巳初夏乞假南歸訪萬夫於邗上賓友
封之兄弟具見聯珠劉孝綽之文章惟同一姓
船橈甕社杯酌紅橋俄而兩點金焦地分吳楚

雙流章貢天人衡廬致日南無烏鰂之書忽嶺
外接朱藤之杖登盤野果時已過乎荔枝作饌
溪毛味或兼乎蓴菜流連雪臘過從花朝忽聞
與伯氏蕉飲言返廣陵旋游北薊因和顧書宣
編修贈蕉飲之作以送之韻凡三疊險已闢乎
蠶叢思入九淵空難結乎蜃氣已

我如退院空山僧四壁無物不聚蠅提瓶飲灌儘
自足封鏡凸凹無人憎丁丁伐木冬昨過采采盈
綠春方會芒屨久破從見底麻衣懶着那繫繩與
予問答有誰侶老猿警歎時一磨不難立骨學槁

木亦許割肉饒饑鷹君家江南好兄弟天門雙峙
高峻嶒江淮河漢一氣接雷霆霹靂交相乘蕪城
相訪追往昔城頭星落天猶曹君從紅橋飲我酒
楊梅五月冰盤登美人一歌客一醜見君坐立無
虛矜尋吳適越道非遠紀羣到處人人稱南遊豈
料來嶺外昔年意氣今逾增白龍何故尚魚服小
鳥不識乎大鵬黃金入火百煉出洪爐鑄就千光
騰讀書論世具今古天地與君人全能我欲煩君
數相過有茶入餅泉三升湖中鯉魚長尺半朝來
况挂寒湖罾陂田秧馬久未下傍午日色如晨興

竹間佛桑花照眼頗似芍藥銀含稜越臺木綿更
可愛白日天半懸紅燈惜乎置酒不解勸荷鍤埋
我常自懲濤聲入夜疊笳鼓官船旗尾搖波層長
江萬里直轉瞬斷崖削壁垂空澄炎州火德春較
暖海雲併作陽烏昇女桑映水枝婀娜綠楊踈地
絲鬢鬢墳笮迭唱有新景柴門獨閉無故朋只餘
公讌詩滿首廻環深玩還細瞻

題王令詒松南柳磯圖

秋空一片吳淞水蕩入青天明鏡裏寒沙浙浙漲
前汀歸雁提提下叢葦遠峰落照景屢變明霞歛

色烟還紫石橋掩映薛澗湖柴門彷彿臨頓里松
南月出更幽絕柳條踈地涼風起先生磐石坐不
言風流豈是天隨子銀魚三寸鱸四腮垂竿撚鬚
而已矣我家亦有芙蓉溪鬱水往往來赤鯉短策
箬笠徒爾爲挂鈎船頭失船尾與君之釣亦如此

送周梨莊歸江南次留別原韻

清淮不入黃河濁高人好似雲中鶴冰雪那容更
上塵山川或取收行橐蜉蝣衣裳振楚楚誰識靜
者尋寂寞不妨自號愚谷愚一任人同惡溪惡我
家城南宅半畝臨湖早著撈蝦屨菖蒲出水含紫

茸修竹侵牆解新籜閉門累月絕聞見恐驚衆諾
予獨諤世道從來蜀道難人情大抵魯酒薄君爲
海內老者舊猶向匡廬遠持鉢卽從庾嶺策烏藤
亦是長風吹飛藿訪予湖上話疇昔十年以來無
此樂花氣薰人在隔簾傍簷輕燕穿紅幕兩人肝
膽鏡可照鬼神瞰室無愧忤何緣告別枉詩篇匆
匆無乃費酬酢龍門之桐太寥亮孤竹之管敢含
嚼看君發擢還江東使我北窓徒企脚

送樊崑來太史主試還朝

長風夜半吹海水虎門潮上三百里銀山雪屋堆

嵯峨曉來一片光如紙官船鼓吹揚旌旗津亭車
馬紛交馳燭龍銜日照灑灑垂楊夾岸飛絲絲前
頭後頭張鐵鹿漁蠻緩度珠娘曲菖蒲抽後躑躅
紅鷓鴣啼處靡蕪綠君爲天上文昌星上帝詔命
司南溟玉衡尺寸定九侖神魚變化騰百靈紫貝
明珠無不見探奇更入珊瑚殿來時山驛鳴秋蟬
去日江波掠春燕嗟予洗沐歸八年柴門臥疾寒
湖偏燒畬收米甑待爨書帖乞藥囊無錢長安無
復知名姓白髮如霜掩青鏡鍊魄常時讀道書求
心到處觀僧定有誰知我爲何人君獨訪我情最

親只道在笈是鸞鳳豈知行地非麒麟傾肝吐膽
深相許芭蕉夜雨燈前語薄酒還令出蟹泉素盤
或一陳鷄黍有時憑吊空古今慷慨激烈爲豪吟
吳歌楚舞亦讌會探梅衝雪仍幽尋天使風流自
來少多才况復憐同調牛女東南見典型羅浮面
目開光曜忽聞告別中皇皇綢繆頃刻成參商絳
雲浮霄氣舒卷北斗插地天低昂皇華使節承恩
重對揚休命天顏動垂橐曾無陸賈裝得賢尚獻
王褒頌依然出入承明廷宮門掌漏聲丁丁清佩
透迤美黼黻簪筆予奪嚴雷霆回憶故人長寂寞

俯仰蒼天幾寥廓荷鍤臯烟豆葉稀橫舟野水蘆
花落嗚呼男兒立身富貴貧賤安足言惟有古道
能相存看君整駕排天門予亦放足入極翻崑崙

崧臺篇祝石瑯公制軍

崧臺拔地高接天崧臺高與河漢連崧臺日出天
上懸金輪照耀雲霞鮮五羊八桂朝當前湘灘西
下南溟滇麓冷朱戴兼龍編上游雙峽扼吭咽有
如玉壘和金躔我公節制斧鉞專東南半壁無烽
烟士林頽壁安縵絃仁以布德威執權大法小廉
肅官聯農畝鑄趙田爾田百貨雜揉商市厯各各

樂業無恒遷有時講武思防邊翠旌孔蓋魚須旂
將士犀甲虎豹韃止齊步作人列然蒐紅跨獵爭
獻豸九月秋氣天和妍河靈岳瑞鍾大賢我公尚
書北斗尊轅門鼓吹何喧闐馬蹄輿輻人摩肩祝
公松栢金石堅我從休沐歸十年荷公吐握中心
鑄何以祝公維倅佺申伯吉甫文武全崧嵩蒸民
詩有傳爲公載誦崧臺篇

題陳天池小影

男兒七尺墮地作虎子骨相森森具奇氣不能爲
文便學武笑取人間一大帥承明掌故握赤管爭

似貂裘坐龍驥君年二十誇鷹揚金花插帽生輝
光殿前宿衛立可致軍裝錦帶垂珠璫指揮自足
拒鉅鹿神畧可以獻我皇幽州九月射躡柳長陵
銳頭好身手引弓一控雉帶箭草間狐兔無不有
腰挂金魚不顧人逢人每問君來否誰知北土風
雪多君行幾度成蹉跎浮雲富貴視蒼狗翟泉况
復飛雙鷺竇田赫奕究何益李廣失勢爲人呵行
藏不用季主卜自結西園白茅屋門前濯濯一樹
槐窓外蕭蕭幾叢竹拋却陰符舊日書較成樂府
新琴曲鄉里小兒真可憐倒篋自數黃金錢南中

寶貨馱大馬有意輸納云助邊得爲小吏矜僮僕
顧盼鷄犬皆神仙看君掉頭無一可眼底何曾及
細瑣江漢從來絕細流天上星辰偶然簌高談上
古由洪荒大塊不平來告我我從休沐還舊林十
年臥疾寒湖陰移船在湖滿蝦菜飽飯往往聞龍
吟世間萬事付不理誰與是古而非今肝腸如君
一片鐵六丁鑄就洪爐熱飛上虹蜺化紫烟滴來
鵝淚流紅血激昂感動人銘骨不患沉香不成屑
爲君貌者誰畫圖偉然冠佩一丈夫索我作歌胡
爲乎卷施中心抽欲枯不識似君平生無歌成擊

碎玉唾壺

贈謝可南

我觀張子房仕漢爲報仇四皓居商山儼然巢許
儔一旦出安漢乃爲後世羞不似子房去學赤松
子脫身但願求封留君不見梅福托跡吳市成高
蹈逢萌一往海上不迴顧焦先辭詔更深隱司馬
入山無所慕人生歲月如跳丸今日爲新昨爲故
縱使生成廊廟百尺材不若放浪江湖五石瓠古
來磨鏡稱潔身賣漿亦是英雄人竹實青琅玕松
栢蒼龍鱗臥壑任霜雪生意隨陽春天造草昧雲

雷屯行藏何地非經綸君家住在扶桑海大小虎
門在其背日月出入無內外手斲珊瑚作釣竿釣
得白龍常不愛忽然海水飛萬里洪濤奔帝江舞
干戚朱鼈遊天根君也消盤沐浴臨星辰冰車電
馬同一塵蒼狗浮雲不終變天地清寧立時見鐵
笛橫吹出夜漁香泥新啄巢江燕士女銀釵扣銅
鼓井里酒帘設芳甸君也白髮如銀絲養成反覺
同嬰兒人疑草創大還藥天予玉角仙人姿龍葱
之骨枉爲杖潏潏之鳥真能騎中庭之樹復何有
的樂瓊蕊連緇枝翩翹么鳳繞樹底中有金鳩騰

天池今辰何辰夕何夕銀河天上成空碧鈎月斜
生學上弦雙星暗度歡同匹紅樓處處墜蜘蛛赤
岸紛紛吟蟋蟀世人此時盡乞巧我不乞巧獨乞
拙從來質朴多勝文一有聰明掩其德惟君之生
協其吉南極朱鳥南宮星權衡昭灼三光廷太微
之前稱第一少微處士垂星經豈無盧鴻草堂誇
捷徑終南地軸行當平華陽山館構句曲此人姓
字留金庭君近羅浮軒轅宅道士倘有遺黃精太
乙古初運元氣北斗酌漿流玉炁仙樂何曾在四
廂天酒邨論沙糖味市橋水漲高蜃樓請君更築

芙蓉一十二我從朝臺一望之湖中製得紅蓮衣
扁舟入門訪君陳一卮與君漢陰同息機

六瑩堂二集卷四

南海梁佩蘭藥亭著 龍眠方正玉鶴洲編

武林翁嵩年蘿軒訂 南海廖 焯南暉校

七言古詩

吾吾研歌 有序

研爲明熊制軍心開所採石香山何季長之家
藏也持以相贈予喜其質而不琢有類於吾因
以命名作歌紀之并柬季長

玄精闕在端溪裏鎖鑰洞門流石髓不遣鴻濛與
世聞忍令混沌當前死雲根連蜷露輪困雲角削

垂金鳳尾其下龍唇不上絃上者焦頭貫無耳青
花團團縐還散中涵一點芙蓉紫錦囊褻就勝玄
玉蒼蠅驚去疑寒水元氣淋漓墨半牀涉筆立可
書十紙雕琢無多絕奇巧摩挲一片皆純理君持
相贈真古人謂吾質樸與石似以吾名石石卽吾
不能如石吾愧矣

題王紫詮觀瀑圖

長松屈鐵龍鱗皺瀑布飛空出雲竇陰厓激射無
時無天乳濛濛大虛媁使君自着青茸衫坐來丰
骨何巉巖玉冰洞地見肺腑旁羅日月行秋潭元
氣淋漓大無外銀河緯繡失破碎使君神明日灑
漑天門詖蕩在其內

花朝招姚東膠陳元孝王蒲衣陳獻孟林祝
萬姚非漁姪王顧暨兒靈鞠雅集六瑩堂卽
席分韻檢體送東膠歸樅陽

春山春水光相映一帶臨城夾湖鏡拖上裙腰草
盡齊壓來屋角花才正綠楊嫋嫋結絲圈黃鳥關
關學人詠良辰讌會那易得上客東南况難併何
妨錯雜忘主賓大好蕭閒寄情性几榻方圓列坐
隅益盤飴通誠敬酒政分曹拚死埋詩壇約法

排生硬抽思誰者甕離繭提筆儼然弓束檠蘭蕙
清吟賦是騷藤箋妙墨書同聖稠疊方將贈答頻
離愁忽向懽娛迸去年臘雪魚負冰今歲參星斗
移柄無論江南與嶺南漸覺春令如夏令客去風
帆不待時我生朋友以爲命坐思江上鱗鯉肥歸
及山中櫻笋盛贏得龍眠入畫圖捲起鈎簾四牕
淨

送王君道歸會稽次曾秩長韻

將軍第宅讀書客崧臺十度樹杉亦挂帆一旦還
湘湖雉尾尊絲團數尺知君天馬出蒲梢眼見龍
鬣與鳳臆翱翔豈有天門限動靜不離易損益寧
忘省覲入薊丘暫住葢山計亦得孟冬十月着鼠
裘打來雪花大如席母論相逢與相識有情淚洒
腥紅血

題徐虹亭看奕軒圖

太極陰陽黑白判週天之數誰布算星宿離離象
緯陳方輿一一鴻溝斷文軒綺榭白晝閒玉枰點
處莓苔斑有如石亂疊魚復或繞灘折行烏蠻世
間無事非棋局高天厚地原刺促虹亭袖手總不
言旁觀日在松陵屋嗚呼君不見勾踐爭博徒相

欺劉毅一擲百萬羣道之何似爛柯樵人歸路失
海中見賭龍宮橘

古別離送人歸翼城

古別離太行山上聞馬嘶黃河走落東海爲濁泥
日月自古晝夜分照耀至今不得並出仍東西古
別離別離令人老梧桐生井底儵忽成合抱靈娥
后羿妻藥顧煩兔搗男兒七尺天地身金石堅固
當永保君不見墻頭枳殼花卽是古人今人往來
道

羅浮四百三十二峰歌贈石大司馬

羅浮四百三十有二峰峰峰斲出青芙蓉鐵橋橫
亘在天半金陵地肺遙相通相傳堯時警洪水一
山浮與羅山同至今兩山互離合飛雲不定搖長
空更聞蓬萊割左股磅礴上下行鴻濛璇臺瑤室
亦何有七十二所環玲瓏旛幢左右南北斗玉皇
端坐朱明宮鬼神呵護有神物宋時玉簡銅魚龍
仙人來朝擁芝蓋或騎蝴蝶如颺風豈無黃麟並
騫駕亦有暗虎難得逢貴人入山不時有五色小
鳳鳴笙鏞奇花異草產無數銀鱗霜鬣青虬松黃
精閔土截玉肪菖蒲抽節含紫茸軒轅舊宅有誰

閉白日搗藥聲千春丹牀藥竈白茅屋或有弟子
稱葛洪從來學仙坐小劫大人造化歸牢籠百粵
江山一輪掌召穆南海周公東泮河之水徧甘露
鶉鳥之火和春融我歌羅浮以祝公百年三萬六
千日洞天福地誰能窮

題張損持太史梅花小照圖卽送歸松陵

我生愛梅如愛命每到開時少鄰並標出墻頭格
自高倒垂屋角花逾盛極瘦還能雪共肥深寒不
畏風吹勁恨不穿林夾水斜安得看山萬峰靚去
年南海若士遊今年丈室維摩病大好無如鄧尉

山尋常莫作揚州詠處處蜂房與蜜房連連水鏡
涵冰鏡烏帽欹簷暗未分紅擅裏昔光先映如何
君客兩歲除拋却家山一春令貌出高人入畫圖
要比孤山托清淨半幅鴻濛氣已全一時瀟灑心
無競雖然野服見鬚眉也隨直榦排生硬太古以
前無此情淳朴之風得人敬金粟寧忘記本來玉
皇况是知名姓天涯杖底同乾坤嶺外星分移斗
柄滄溟風起萬里流笠澤雷鳴百花迸粵曲新城
燭下吟吳歌候發江中榜

此孟切

題顧梁汾所藏楞伽山人遺跡寄納蘭侍讀

愷功

吁嗟斯人不可見流光儵忽如虹電回憶從前十
九年通志堂中集名彥丹轂時爲清夜遊簫笳屢
發南皮讌君才直足賦鳳凰君書耐久同羲獻朱
鷖裘多內賜衣黃扉閣近承華殿一使梭龍逐六
羸九塞降旗迎四面校獵長隨豹尾車吟猿或墮
鵬翎箭慧業生成世所無新詞制出人爭羨再索
誰爲象罔珠欲焚我愧君苗硯只言主鬯共齊盟
那識乘箕動星變天帝居高詎醉觴人間日短無
長線七尺孤墳種白楊一夕秋風泣團扇北道桑

乾向潞河南方葉落填奇甸檢篋猶將舊札開迴
腸豈禁中情斷數行字等雙黃金半點墨酬百匹
絹梁溪老友藏此卷使我展看淚如霰遼東丁令
有時歸上古大椿何處算維昔楞伽自署名早知
兜率前生院下界巫陽些不聞飛鴻雪印踪難戀
仲氏高才與後賢相門兩世承天眷幽谷崇蘭大
庾梅馨香寄贈因風便

答魯思亭卽送其北上

君不見鏡湖一曲環四面光風左右芙蓉扇天姥
高臨濯玉池禹陵倒影開銀殿羃歷屏風隔坐山

沿洄野水前溪練縐縠鋪成翡翠羅生綃織出琉璃線垂楊深夏亂鳴蟬細草方春掠輕燕不少遊人人畫圖也教蕩楫搖釵鈿讀君之詩有如此使我清宵竟忘倦薤簞徒虛白石牀燈花屢落紅絲硯靜極還令日月翻空中忽覺神靈現落迦瀕洞行波濤傾湫大小居龍雁制險那愁激瀕驚爭奇應賀淮淝戰健筆驅來鐵亦柔新詞鑄出金能變閒林閉戶枉乘車高論懸河急飛箭聲氣從今益共親姓名早已曾相見坐久何妨到午鐘情深恨未陳芳讌幸貽蘭蕙愧騷人喜得機雲並才彥手

握神珠合夜明身同美玉當誰薦卽看萬里驥空羣一奏甘泉上稱善

題黃燕思度嶺圖

唐裝結束衣帶殊高冠大帽無時趨奇傑之氣生虬鬚氣則奇傑人則儒旁一秣馬蒼頭奴前年北登醫巫閭九邊萬里飛龍駒周歷谷蠡窮沮渠今年南度大庾嶺矯首高天萬峰逞雄關鐵鎖旌旗整欲度未度何徐徐棧危半截虹蜺影長松崩壑倒鱗鬣紅梅夾驛通廬井山城鑿道板屋懸車麟振鐸行人警中原共指爲炎方朱垠隔斷天茫茫

自秦屠睢入作尉倏爾反覆如蜩蟬尉佗僭竊當
盛漢劉龔割據起後梁其間久負被遷謫悲歎有
似流夜郎豈知南交所自始堯時命官已經理虞
舜南巡奏韶樂毬門雙闕天中起成周白雉貢越
裳陳詩復見出僭耳職方記載屬揚州星域分明
次鷄尾堯舜以來四千年風氣開闢相後先昔爲
甌脫今重邊巨溟水深作平地荔枝龍目連花田
風俗椎髻變緣飾宴會豪竹鷓鴣絃明珠翡翠等
閒爾文章事業人斯傳愛君詞賦推妙手五岳巾
箱無不有驪珠是處誇人口嶺外山川閱鬱盤古
來人物稱誰某乞一賦詩垂不朽予亦披圖拂箋
絹走筆長歌托壘曰更有羅浮四百峰碧空削出
青芙蓉天雞三更叫峰頂扶胥海湧金盤紅朱明
窈窕開陽宮仙人騎龍耳生風金陵地肺遠可接
請君神馬行鴻濛

題黃仲賓浮海圖

天地之大中有我九州六合無不可一龍一蛇與
變化南箕北斗隨挹簸太虛寥廓憑作舟元氣微
茫鼓成柁魚鱗騰來行卽行采旄倚處左者左弱
水瀛洲莽迴互水珮雲裳交婀娜逍遙天上玉女

留遊戲人間歲星墮君胡感憤欲浮海橫身枯樹
風濤坐手持鬪體露生平高陽擊筑猶細瑣修羅
王掌月半輪月氏飲器頭一個睽睽都忘日母歸
冥冥誰見支祈鎖馮夷鳴鼓帝江舞魃磬鯨鐘八
音播此時海水盡飛立中流自在平不頗大醉不
知其何鄉那計醒前將鍤荷入甕須爲酒蠖蠓附
人堪笑蟲螺羸激轉乾坤上下浮劃開混沌玄黃
裹忠孝心理埋斷劔冰肝腸血鑄洪鑪火丈夫得意
會有時莫歎升沈願難果

題周黎莊廬山托鉢圖次陸義山學士韻

廬山面目無背向托鉢爭看比丘相此間却少尼
連河誰有乳糜來相餉袈裟半幅紫伽黎猢猻七
尺青藤杖識得相逢我是渠不愁兩足無處放

題把酒問天圖

寧把酒莫問天天豈爲汝飲酒憐寧問天莫把酒
荷鍤一埋酒何有世人卽醉天自醒夜中朗朗月
與星世人縱醒天亦醉白日冥冥天欲睡不如置
酒不把天不問混沌中央得吾朕天門虎豹當九
闈誰能令汝上帝聞嗚呼巫咸上天招不得楚些
至今人歎息

登羅浮諸峰寄錢蔗山明府

十年閉戶常寡出自築仙湖一茅室滿牀書卷雜
道梵繞膝穉子覓梨栗生來性情少計校但得飽
飯餘願畢獨憐不一登羅浮故人招我東來遊爲
我入山備遊具豆香峒芥花羹甌僕夫筍輿待山
口渡江復有沙棠舟此時山中霜氣滿誰識仲冬
日和暖四百峰遙迸出迎一峰迴顧一峰轉羣仙
天際笑抗手謂我白頭入山晚初疑鳥道行空冥
忽然劃出天地青山人告予以華首滿山巖壑風
泠泠夾溪水響應夜磬石房僧誦蓮花經曉來遊

興益颺發路入金沙洞明滅不見劉王舊日宮惟
有黃龍瀑如雪望中瑤石在雲霧二樓丹霞夾日
月眺聽一寂萬象沈高厓古寺靈泉音登陟企想
緬千載梅花乃至行無林麻姑酒田有紅樹鶴觀
那得長松陰欲晴則晴雨則雨龍潭幽絕無人處
朱草香茸滿藥槽冰泉石竇流天乳水簾挂壁不
到眼尋源誰着青鞋去朱明一洞羣山中無極太
極包鴻濛上帝所照古日月歷朝致祭銅魚龍漢
時仙人稱桂父晉後弟子師葛洪名山到此得經
究十日何由盡前後石髓難忘入齒牙雲嵐尚覺

六齋堂集卷四
籠衫袖生人本一大蝴蝶造化原來小宇宙吾聞
泰山日觀當蓬萊天門夜半紅雲開秦皇漢武昔
封禪金泥玉檢埋塵埃又聞太華巨靈擘仙掌玉
女明星兩相向白帝高臨萬壑低黃河背指三峰
上北嶽幽薊地勢雄乾門坤軸擎虛空神京應上
居紫極黑水配位當玄宮中嵩二室三花迸笙鶴
時聞過緱嶺衡山九疑相聯綿祝融一峰高插天
峨眉西蜀盤天起直到大峩八十四天台迢迢三
石梁雁宕幽奧龍雁藏金陵地肺在句曲廬山瀑
數匡王谷何如羅浮二山離合同虛無堯時一水
浮蓬壺其高三千六百丈峰至絕頂飛雲孤呼喚
元氣受橐籥鼓鑄萬物還洪爐身着龍虎衣直與
天爲徒龍葱之竹不用扶寄書紅翠下瑤室故人
知我留天都

冲虛觀古梅行

冲虛觀前有古梅傳是葛仙手所種千年老榦積
鐵黝一樹繁花照人凍石室斜窺入戶飛玉晨上
作焚香供當時葛仙自汲井豈少弟子代提甕灌
漑年時接混茫支撐造化排瀕洞丹氣常存舊蘊
隆罡風不畏新搖動拚死層層大雪埋爲生日日

高人共世情閭巷誰解識天骨巖崖自驚衆生長
金庭格已高結成瓊蕊蜂難鬪童子壇邊執茗帚
瘦鶴堦前啄輒縫分明天地剩寂寥納取玄黃養
虛空名山孤兀不傍人肯信仙材竟無用欲去還
遲玉女留雲中么鳳來相送

林沂澤羅浮珊瑚杖歌

手抱日月珠晝夜盡出入尻輿行鴻濛上下徒呼
吸何如平地能飛空我翁綠髮顏玉童一童擎杖
日隨後鳳臺之北棠溪東人言杖與珊瑚似杖中
數點朱砂耳無名有名卽是名以指喻指豈非指

駢枝橫直七尺強看來節節同沈香半結太清檜
左紐或張五鬣松微黃想見山中托根大霜雪風
雷不能壞翁云得自羅浮僧千年古藤出光怪試
執女手長嗟嗟一日何啻三摩挲短衣任意叩牛
角緩步無事稱蝎磨筋力幾曾用憑仗老大依然
見豪宕慣向青帘被酒頰每尋紅寺當花放笑翁
有杖不肯持杖欲告別翁何辭莫作飛龍落藥店
倘化蝴蝶真吾師

石制軍誕日索題長句因作萬松行

定山峩峩出雙峽綠嶂丹崖萬松夾受天元氣含

鴻包拔地蒼精露虬甲清商九月天宇高千里萬
里呈秋毫衆聲振蕩肅耳目寒瀑迸響行波濤左
擎右攫仍排列柯如青銅榦如鐵撐持造化接混
茫醞釀乾坤裹霜雪西臨八桂南搏桑高樗廣蔭
摩穹蒼工師何止作隆棟 聖人久矣登明堂君
不見盤龍柏七星檜漢宋時年至今在萬松萬松
生長當閬風吾知與爾重疊太古終無窮

陳獻孟甥曾志伊壻李敬宣澡躬姪孫雪苑
偕兒述沂竝送予舟至禹陽賦此留別

我年已老尚北征見者咄咄共稱怪春時學步鼎

折足冬日欲涉舟爲芥潮來虎門捲戈甲雪過牛
目關梁隘縱使帆檣當走馬也循阡陌妨沾帶里
居况且粟屢脫客途未免文難賣誰知興發熱如
火不禁痛來癢爬疥上天入地鬱二儀八極九州
成兩戒風沙赤驃任意行星宿黃河那有界蓬萊
雙闕望皇居楊柳一鞭復官解 聖人在上日月
臨臣工列下臯夔拜早朝侍從橐筆隨午食從容
檢書曬玉堂飛遶盡五雲柯亭汲飲皆甘澆欲從
班馬辨異同遍擊鼓鐘振聾聵朱絃疎越絕淫蔓
王風洋溢分流派遭逢休明世希有幸得鼓吹吾

已快丈夫立志人則傳自古鑄金誰不壞禹陽相
送賴公等歲暮分携此江介平生嗜好畏梁肉肯
向旅食忘葱薤縛茅結屋儘可爲烏帽紅氍偶行
邁終當還山買薄田相助躬耕勞犇犗

再疊前韻別獻孟

舟行愛學牛馬走波平幸少蛟螭怪十二月來將
立春三十年前共投芥齊州幾點指可數中原一
髮天何隘冰氣侵眉突作稜雪花打笠飛無帶可
憐細雨昨夜濕欲得南風無處賣黃公酒壚且就
飲麻姑爪甲那爬疥老來久受無盡珠少小已絕

摩登戒分攜禹峽作兩人轉憶羅浮上三界黃茅
夾岸半虎跡紅梅種驛非公廨前路幽并客獨行
今日船舷與君拜龍文百斛好獨扛犢鼻一竿聊
復曬草堂寫入陋巷志棠溪汲取丹泉溼蒼天有
意屬豪傑世人未必皆聾瞶山到南衡地自高水
出天彭衆尋派神龍矯矯兩翼飛天馬猩猩四蹄
快此時朝廟推隻立况乃制作能不壞何人不奉
北杏盟有日來朝葛盧介平居共碎鐵如意夙昔
對眠簟呈薤沙塵捲地馬尚馱土銜張燈日將邁
將入承明侍袞龍敢忘田間策健犗

三疊前韻別甥志伊
男兒七尺在世間爾我俱能令人怪高談河漢翻
海水一味昌歎嗜薑芥不無賢者桑戶狂亦有聖
人伯夷隘琉璃匣裏露鐔鏑芙蓉天外無根蒂酒
錢慣從姹女數粒粒常就餅師賣雖爲柳鍛畧帶
僻不食鐘乳能免疥仙壇招鶴去忘回佛會燒香
跪求戒研田龍尾代錢罇藥圃烏頭立疆界賭碁
花下徒待人結宇仙湖不成解平時閉戶妨鳥啄
今日乘舟望魚拜斜風捲浪蘆荻沉夕陽返照鷓
鷯晒炙爐火熟手掬雲仰面天寒氣食溼日斷關
河總欲昏耳聞猿欲寧無曠君來鬱水別二禺我
出楚江行九派孤裘蒙茸逆風走憎馬驂驛令人
快桃梗衝泥且莫論鐵骨撐空自難壞欲得新詞
袖細吟幸拂長箋書倒薤幽州道上天蒼茫趙尉
城南人耿介豈無蜘蛛報歡喜也憶琵琶卜征邁
三殿雖裁五色雲一官不易兩角糖

四疊前韻別壻敬宣

久向空山守吾轍鄉里衣冠各疑怪居宅曾無半
樹桑爲園祇有一畦芥古時朗月今尚圓井底點
燈自尋隘季鷹每想作鱸膾朱鷺都忘食茄蒂時

時白雪空斷吟日日清風不勞賣古琴雖畜常破
囊藥物無關及醫疥不少投壺玉女留長思入廟
金人戒南溟荒落日極垠北竈寒門塞窮界且隨
宮柳夾御河一見官槐暎新解玉皇殿上覲龍顏
金馬門前稱虎拜仙漏吹來靜到微紅雲綻處光
如曬斑管將裁羽獵賦露盤待賜仙人濯遍觀黼
黻炫衆盲更聽球鏞醒羣瞶左掖梨花一道飛仙
仗龍旂五方派分明齋肅當立朝自覺平生無此
快得逢萬壽正無疆頌以九歌俾勿壞東堂箋奏
出黃封秘閣圖書列金薤天地繁華任往來神明

寂寞游清介好憑鱖鯉頻寄書念我車輪遠言邁
酒泉氊帳背明駝溪屋芙蓉秣強牯

五疊前韻別塔深躬

平生氣薄天上虹黃金入火出光怪動心豈必爲
龜羹鬪勝從來笑鷄芥僬僥短人畢竟短牛羊隘
巷終成隘昨者種田得璧玉肯因納履離瓜蒂我
爲兒女長自牽汝有文章未能賣聰明可幸全五
官疾病不曾沾一疥置書萬卷久自淫挂酒一壺
今始戒嵩華衡岱括地軸日月星辰列天界自南
自北從出門陶復陶穴隨作廨大道重爲京洛遊

下風惟望崆峒拜長謠馬上或乘興滿腹路旁實
難曬旃裘裹身當狐貉冰雪飲同沆瀣招搖肅
肅天四垂車馬轟轟衆猶曠聚獵韓盧逐向風爭
樹昏鴉落成派惜別寧無遠相憶此行不過求一
快自知金石不易磨亦見天壤有時壞生來量食
僅勺米淡泊登盤數莖薤動中未免近流俗靜極
依然立孤介好寄家人莫惆悵爲言老大尚豪邁
湖上多添養鴨欄更築牛宮待耕耨

沂兒送予至禹陽不忍遽回臨別留一扇索
予書舟次韶石燈下作長篇寄之

讀書只學守章句古人糟粕而已矣大儒學問有
根本一事必欲窺其始假如兩目日月明用作雷
霆耳卽是滋味香臭亦齊等鼻觀香臭口滋味人
言天地人三才不知天地吾身裏五行日用如轉
環七竅那有混沌死恒華嵩岱起方寸江淮河漢
直杯水古人大言與小言入之出之盡原委不然
高明鬼瞰室細者兒女相汝爾伏羲當時畫八卦
後惟文王與孔子其中精微悉太極楊雄準易誠
可鄙宋儒紛紛著傳註畢竟訓詁屬擬議尚書出
自魯恭壁不遡軒黃遡姚姒其初謨典互參錯伏

生口授始次第制禮作樂升明堂間用兵刑絕奸
宄不刪呂刑錄秦誓垂誠後代良有以詩歌三百
風雅頌篇什洋洋溢人耳西雖白馬來賓王玄鳥
高禘肅郊祀其他曾孫慶梁茨亦有孝友包鱉鯉
國風好色而不淫芍藥何由及芣苢春秋書爲萬
世法仲尼豈獨爲魯史七十二國十二公一一筆
削嚴載紀河陽之狩首止盟斧鉞煌煌申大義龍
門接踵更扶風涑水紫陽相繼起曲臺不過漢儒
作列之于經毋乃侈觀其臚列備鉅細文字典蔚
非繁靡譬猶大樂撞鼓鐘相應誰能去宮徵至若

王制及祭統四代之治亦如此我初讀書嗜莊列
謂極變化露奇詭究之經學若朝廟何暇蓬萊觀
海市愛汝讀書師古人不覺爲汝言娓娓塵垢萬
物在胸臆陶堯鑄舜有其理自從禹峽一別來日
日北風捲旗尾度關韶石逢立春再拜虞祠畧差
喜可惜瑤瑟無處聞欲吊湘靈悵難已墨江侵星
入臺嶺鳥道千盤戒行李章貢風帆卽順流想到
潯陽疾如駛幽州朔客北道來爲我前頭執鞭弭
玉爪惟看鷹放條霜蹄誰識馬加齒青徐大雪渡
黃河白罽一裘行萬里風雲遇合冀我皇眼見斯

民方殿屎爲官豈必多得錢平生水清惡泥滓作
書夜深附僮僕燈下落筆難到紙明年汝弟過扶
牀望我應能北窓企不知何日果來歸抱犢耕田
看雉雉有黍翼翼穰穰門前仙湖鏡相似等閒
日坐烏皮几汝弟上膝將我鬚索我梨栗出十指
自英州入韶陽舟中作

英州兩日看不足拔地千峯萬峯矗冬寒雨少石
色瘦猶似美人出新沐崇巖乳竇綴瓔珞壁面削
者耀眉日雲霧綿聯象九疑想到春來一天綠江
波水碧照見底風起微微縐羅縠前灘水激飛箭
來汀頭無人渡洄洑篙師擔篙與灘鬪琵琶坎篔
敵鼗祝明日韶陽一帶行十二芙蓉挂晴瀑有虞
遺廟薦蘋藻一就陳詞戒明夙楚人屈原宋玉死
離騷九歌無人續二妃靈瑟若可彈神絃再請題
斑竹

將至昌州距四十里風濤大作感賦

幾日以來風雨作今晨更覺風濤惡汪洋鼓浪鯨
張牙噓噏歛空龍觸角乾坤廣大任浸灌宇宙週
圍失垠堦天上分明不見根地中何處能尋絡虛
言九派出潯陽那過五湖入吳岳話來爲客動懷

抱感歎如夢殊昔昨擊汰揚舠知幾時痛飲高歌
且爲樂安得錢王弓弩手爲我明朝射潮落

樟樹鎮下阻風作

黑雲沉沉天欲醉北風如刀割江水一氣空濛不
見人蛟龍戰鬪波濤裏江間戍樓夜吹角腰佩火
鈴出江市大船拍岸樁鐵矛小船檣頭曳其尾禁
寒擁被坐船底燭跋數寸猶未已客行有路信皇
天十日北風非常理徘徊明日知何矣

題漁洋山人荷鋤圖

并序

御書賜山人帶經堂山人因取漢兒寬帶經荷

鋤屬禹鴻臚慎齋作荷鋤圖小照而以杜少陵
帶雨荷鋤立秋猿吟翠屏布景其間屬予作歌
江天不辨烟中樹水雲山雲共一處輕帆幾點半
空沒醞釀川原漲成雨遠峯翠濕猿尚吟新苗綠
遍菰蒲渚就中行田寄超迹漁洋先生得其趣鴻
臚好手爲善傳廟堂豈有藏農具御書鸞龍表經
術許身稷契方隆遇荷鋤只合付閒人待我騎牛
獨歸去芙蓉別業種紅秫手輯農書自箋註

題劉雨峯農部小照

左持玉杯右披卷口雖不言意何遠芭蕉葉大桐

葉稠坐來衣帶風颼颼綠楊朱荷兩相映恰似美人對青鏡鏡光鋪出黃琉璃迴風日暖生文漪京師何處得此樂醉後微吟曠丘壑先生家住八寶城射陽湖闊搖空明長夏不知有六月遶湖人家浸冰雪此時稻熟連菰蒲湖船爭上魚菱租糟牀壓酒注甘瀼紅裘裹鴨向前賣人生適意不在多爲郎白首當如何先生畫圖應爲此風景江南洵清美何不并我寫入畫圖裏

賸酒石歌爲顧書宣賦次原韻

天上酒旗星不隕示人愛酒人不省君家有石似

石魚怪底閉門日沈飲安得酒滿成江河招我過涉隨滅頂吸來不數月氏頭醉後卽作龍宮枕近時雕琢尚銀槎往者支節尋木瘦豈識鑿窾亦混沌分明虛受由賦稟離之遂覺顏色衰對之頓使神明迴花辰蘭夜節融和月皎霜空氣清冷滄洲新壓出香潔西涼舊釀藏深蘊傳籌就此任磅礴立政無乃限畦畛除却逃禪繡佛前何妨墮珥遺簪近天津枉勞糟丘築酒泉無用渴羌請劉伶荷鍤死便埋阮籍六十日不醒漉巾更有陶柴桑并起千古同醪酎

題查德尹查浦書屋圖

高峯劃出千重嶂，靚面青崖屹相向。疑是金牛渡海來，遠從天日來天上。中有瀑布搖長空，倒挂百丈如白龍。石磴合沓露吸磯，巖花的歷穿玲瓏。愛君于此構書屋，前頭後頭蔭松竹。甲帳編齊玳瑁簾，牙籤插迸珊瑚軸。誦聲琅琅響空山，猿吟鶴嘯於其間。把卷往往至，月上朝雲暮雲相。往還客至一任卸烏帽，美酒糟牀正新壓。嬌兒問字悉躉尾，侍女司香爇螺甲。重樓飛閣更接連，居然韋曲尺五天。板橋迤邐下溪谷，蒼鳧茈魚蒲蓮世間何

處有此樂太古以前代懷葛，不似飛鴻落雪泥。等閒倚杖臨丹壑，只今出入承明廷。笙簧六藉鏘五英，何暇咿唔學林下。腐儒取照蓬中螢，大兄况侍芙蓉殿。御食金盤賜珍膳，小阮常時覲玉皇。一家著作同班椽，縱令洗沐還里閭。衣帶左右垂銀魚，大鵬之息亦暫爾。不久卽見天中書，惟我片帆返南海。仙湖無恙敞廬在，遙看詖蕩天門開。君仍驟駕登蓬萊，名山踪跡總由我。閉戶著書始願果

題許甌香山人書畫冊

先生本是丹山鳳，五色文章早驚衆。置身立可霄

漢高不值其時寧勿用六十年前處鄉國海內風
塵方瀕洞蒼鵝一見翟泉飛赤子屢向黃池弄先
生矢爲謝臯羽洒淚西臺抱沉痛青衫烏帽隱踪
跡剩水殘山託吟諷陰陽任從天地剝松栢不嫌
霜雪凍偶爲圖書寄蕭閒絕非人世堪伯仲細看
烟雲蕩無墨都似造化特留空山川挂眼總入冥
蘭竹無風亦如動法書神妙更希有騷裏天門絕
飛鞚古來筆墨傳至今誰似先生以人重展圖景
仰想千載從此時時入魂夢

題費曉亭飯牛圖

垂楊二月飛絲滿菖蒲抽節荇芽短草色茸茸綠
烟暖布穀倉庚叫聲亂此時隴畝無東西農夫到
處分扶犁土膏霖霖下秧種叱牛服軛行衝泥君
胡有牛不耕作怒肉陰虹映驛角但教弩力食細
草戴笠一任風吹却看君意態超常倫以此寄託
辭風塵豈知飯牛取卿相古來俱是英雄人嗚呼
君不見銳兒廬兒好弓馬笑取功名入圖書何似
抱犢山中任徜徉一問牛喘知陰陽

贈尚櫟山

天下幾人數十年一路相知成白首講求學問到

性命菜根道人吾老友往時俶儻稱貴遊錦韉駿
裹貂鼠裘僕姑偶試墮鵬鵠伎曲善解彈坎篌落
筆驚人更殊妙慧業生來自年少手中滿握驪龍
珠天上高吟鳳凰嘯旁人共指爲顧厨縱橫几榻
皆奇書自起聲名著銀榜詎數袴習垂金魚春州
出宰興興誦養鶴無過一清俸女兒采葛男耕田
繡額蠻渠不敢動至今功德留桐鄉當年治行齊
陵陽豫章之材棄山澤鐘簾何處登明堂浮雲事
業了可見白衣蒼狗三時變世情大抵在涼燠古
道誰能渝霜霰惟我與君松栢桐依然天矯如虬

龍風雷霹靂任白日柯幹鱗鬣仍深冬自從南北
兩地隔遠道時時枉書札只言眇望同雲山豈料
相逢吐肝膈疋馬重來備苦辛簇人十丈長安塵
僻居頗類蓬室士忘機自謂無懷民海內詩篇徒
聒耳當前那得有知己君從藥市聊逍遙我入金
門等遊戲華陽館中倒酒杯醉後共上黃金臺撫
弄日月遡盤古跳擲造化如嬰孩昨者一病久不
却頭岑岑然氣蕭索消渴難擎玉漉漿通神君炒
珊瑚藥藥王出世願結成兜率降下夢有徵毘嵐
風惡劫灰黑拯救無暇論身名卽今學道芟郭郭

大笑枯禪守寂寞證心久在楞嚴經起舞何妨乾
闌樂嗟余歲月徒蹉跎白頭始自稱維摩蒼筍不
肯飯香積醍醐要欲尋葱河凡情既盡見真性與
君同出女子定琉璃內外一片徹水月光明萬川
靜燕山八月吹北風我行將逐南飛鴻蘆花蓼花
兩岸闊柿葉楓葉高林紅吳船取道潞河去波濤
天上隨風御他日天涯憶故人結屋羅浮最深處

題唐子畫冊

佳山佳水何處無幾人天下盡登眺惟有畫圖置
几案臥遊可以窮衆妙唐君好手天資高胸中滌
蕩生瀾潮泚筆往往在幽澹造微一一含纖毫自
云欲得古人意豈知變化隨所至分明絹素成烟
雲詎有鬼神運其臂閒雲斷處空山遠亭臯木落
秋林晚蔽日陰崖夾瀑流千峯積雪行人斷細看
十幅無一同得諸造化非人工別有著色似沒骨
夕陽倒射金芙蓉或爲王右丞或爲李思訓或爲
郭熙董巨源總之超逸非凡近君乎何不爲我再
寫一幅歸去來挂帆天外南溟開珊瑚釣竿拂若
木天地于我何有哉

題汪東山秋帆圖

潞河水漲今順流片帆高挂乘清秋蒺藜花蓼花雜
板渚楓葉楮葉迎柁樓長風迅疾如飛鳥峰巒倏
過青齊了路入淮南楚甸寒江迴白下吳門曉還
家暫解佩銀魚入夢鐘聲草閣初等閒拂水看晴
瀑還向包山讀道書

焦山別銘圖爲王紫詮大叅賦

焦山一髮天畔青海門截斷烟冥冥真人昔時此
瘞鶴玄黃幣裹雲松扁銘中一百五十字立石紀
年備旌事得來華亭遂寥廓化去朱方失騏驎或
言銘是右軍書豈知標格全不如世人耳食喜附

會錯誤帝虎訛魯魚蕭梁迄今歷年久波濤山下
雷霆走猙獰豈免蛟龍觸緘滕賴有鬼神守神物
終然出世間譬之二氣當循環不是其人不能見
到山往往徒空還南村好奇特相值山根水涸露
沙脊崩崖欹處銘石懸手剔莓苔見真蹟响嘍禹
碑高可摩陳倉石鼓載橐駝何似此銘闕巖壑得
之水府無洪波華陽法書不使斷千餘年來滿人
願楚僧急取入丹青何生許爲搨真木嗚呼西京
鸚鵡舊塔無孝駝之塚藏義烏安得盡如南村者
並與瘞鶴傳其圖

題張來菴小照

五松五鬣排蒼穹左拏右攫如虬龍包裹元氣露
鱗甲白日長有洪濤風遠山隱隱射晴瀑倒瀉陰
厓落潭曲飛爲素練搖絲虹疊出金沙粲明玉先
生聽松觀瀑於其間踞坐磐石何蕭閒神明祓濯
冰雪淨衣帶掩映莓苔斑只今承明擅制作雞戟
宮門侍銅鶴天下蒼生正賴公那得移情向丘壑
歲維癸未行

歲維癸未歌太平四海內外無甲兵京師年登米
價賤民間飽飯還食麩忽聞齊魯民水災六郡州
邑田污萊木皮草根煮充腹饑來男女道旁哭粵
閩旱魃同慘悽地土龜坼難鋤犁三楚之田亦告
水農夫大半色憔悴往年聖慮諭捕蝗處處大熟
多餘糧夏秋屢賜免租賦報賽田神列成路近者
海運爲賑民欲使顛仆沾皇仁又發金錢自內帑
天地之恩誠浩蕩堯湯水旱縱有時氣數診害民
受之洪範八政古有紀下民豈得同怨咨腐儒不
識暗垂淚乞天雨金救凶歲大臣體國多遠謨草
野何用深切膚嗟嗟京師汝民幸豐足慎勿養鷹
令攫肉

令 緹騎行

長安五月生悲風滿城刮地吹向東夜來火光數
百道一一天上搖長虹金吾緹騎奔絡繹身衣繡
甲金盤龍居民見者盡舌咋客舍聞著驚耳聾相
傳朱門列大戟平時鼎食常歌鐘黃紙詔下忽收
逮奉命不得久從容男啼女哭被困苦銀鐺鐵鎖
來相攻國家舉事慮深遠草野不解真愚蒙何況
富貴不易保古來烏盡藏良弓韓彭趙醢了可見
寶田赫奕誰能終儒者讀書墓前哲只合貧賤安
耕農嗚呼只合貧賤安耕農

舟中夜坐卽事

晚來江間浪不起四面無雲天墮水高原樹黑不
見人遠村點火深林裏須臾月出烏鵲飛滿船霜
露沾裳衣蘆花如雪照港口漁翁網魚深夜歸北
斗插地衆星落水鷄初鳴聲膈膈岸上打牛振車
鐸

對菊歌

生來愛菊自澆灌小園築向仙湖畔每年手植數
百本插棘編籬列成段聽人佳花作詩乞間有異
種來山院始栽細小入寸土迨至長大齊高館雖

然雨露得自天亦有人力用其半入秋枝葉已可
覩後到將花更堪玩淺深隨意綴籬落孤傲不曾
避霜霰山僧見訝爲曼陀佳人笑指同錦繖侵晨
晤對把書讀入夜留連忘星飯常籠芳氣入簾帷
時折銅瓶供几案自從春日來薊北故園魂夢無
時斷諸兒不解共愛花小妾愛花勞手釧京師五
月高麗菊花市移栽道人觀南歸津門值九日舟
中那得花覲面故人爲我貽數枝正是花時菊初
綻到眼能令發興孤賞心何止值錢萬半月以來
花更好有若家園放璀璨墜頭總是金雀搖疊瓣
無非雪花卷靜來一味氣芬馥動看四壁光凌亂
使人欲餐爲香色正爾深敬緣勁幹譬如畫家作
竹石有時亦著菰蒲嫩客懷長日得安好燈邊澹
照能扶倦不獨如珠露欲團直教斜漢星同爛嗜
好余爲栗里人當前送酒誰曾慣且待冬來返嶺
南再闢湖齋種無限自居丈室號維摩還期天上
將花散

秋夜長

秋夜長夜長何時休玉繩天上繫兩頭東有織女
西牽牛秋夜長夜長何時息路長風短不得力河

流不似江流直我身安得生羽翼南溟天闊海水
深珠宮貝闕蛟龍吟佛桑春日爛滿眼梅花十月
香成林夢魂先托歸飛鴈家人見鴈莫長盼待我
還時買釣舟釣魚共飽雕胡飯

挂劍臺

交情論生不論死世上之交盡如此惟有延陵挂
劍臺至今人知吳季子臺邊草長皆劍形芊綿滿
地常時青勁風吹翻葉舉舉大雪倒壓光稜稜心
許徐君不忘故還時尚解繫其墓高臺好比魯靈
光碧草何異冬青樹當年讓國同子臧高義史冊

垂輝光何況佩身僅一劍更惜劍在人已亡闔閭
往事可深痛炙魚進食終無用窟室雖成一日謀
兄弟難辭敵人閔君不見夫差爭長向黃池姑蘇
臺上醉西施屬鏤劍賜猶未久沼吳竟在美人手

贈言

君不見黃山松千樹萬樹如虬龍又不見羅浮日
扶胥海上三更出鴻濛天地氣始分金盆煜燐浮
紅雲我皇高御蓬萊殿九點齊州殿前現敕遣仙
人下界來霞旗麾動天門開要使蒼生共蒙福陽
和到處人膏沐南溟之水爲天池洪波萬頃堆琉

瑤銀河相接成一派波流汨汨飛銀濛秋色遙臨
越秀山仙人駐節於其間鸞鶴紛紛日來下猶似
闔風傑其馬夜來列宴彈靈璫北斗插地蒼天高
黃匏齋夫子喜南方物產屬林生石牀繪草
木禽魚画冊命作長歌

吾師曾中括萬有入粵新詩滿人口杖策羅浮四
百峯親見日月開鴻濛上界逍遙絕飛鞚畱題尚
下朱明洞天雞大叫海水光星槎一泛牛斗旁山
川自此歸大雅草木禽魚迸圖畫林生好手翻墨
池鷺溪十幅飛游絲蝴蝶如車復如扇撲來五色

雲中現玄黃朱綠照滿山蓬萊宮雀成仙班聰明
鸚鵡能言語却藏茉莉花深處鷓鴣多向越王臺
美人蕉下時一來暖日和風迎翡翠燕支露滴芙
蓉醉金蜃紫貝兼神螺重溟百寶搖洪波明珠一
寸鮫人目珊瑚十丈龍宮燭桎蘭玉蘂枝青瑤火
樹絳氣連紫霄赤繒映肉晶盤薦荔支時節紅雲
宴木奴龍眼饒瓊膏蠻藤倒挂金葡萄馬纓佛桑
花灑灑簷蔔攀枝樹交墊草中况有麻姑釵果中
亦有紅錦鞵英州怪石琢山骨從陽蠟石結金寶
粵中物產爲人誇吾師博物同張華陸賈南行豈

有此嵇合作狀徒擬議展圖指點全逼真四時景色羅清新瀨江歸日正秋霽又是六朝地佳麗念我空山但白頭依然不忘金陵遊得從長者坐琴瑟異時借問承華側

送翁越岑子毅歸餘杭

南溟海闊生長風新潮萬丈騰魚龍高帆乘風坐天上扶胥日出光瞳矐雲煙綿聯遠相望沂流不識蠻江漲楚尾吳頭數驛亭竹枝殫葉聞漁唱錢塘江上作歸人武林二月園林春芳花紫荆耀朱萼官柳鳳翼張龍鱗回憶趨庭在官舍對牀風雨

常忘夜禮能自立詩能言學成豈是悠悠者神鸞有族麟有駒昌期應運生騶虞掣筆久追趙魃兔磨墨定捉秋蟾蜍才名灌耳人爭噪魏世雙丁梁二到直排閭闔朝玉皇蓬萊列仙向前導崇蘭香草黃金芝尊人與我同連枝端門司祿并執法文昌炯炯當南離我惟歌歎青冥外老子之學純用退近入羅浮著道書丹霞爲裳月爲珮送君兄弟空眼懸恍然碧落星灑連念我山中徒舐犢何時鞭策齊夾轂

贈五羊司馬

白鶴峯頭飲桂酒豐鱸湖中摘菱藕憶曾醉卧黃
琉璃猶自杯槃不離手其時月出四山空君爲地
主爲詩雄蠻箋十樣出供客高詠湖上驚吟龍大
雅之音振鐘鼓詩成痛飲復無數城南北斗欲闌
干梨園弟子尚歌舞勝事今來已十年風流聚散
如雲烟君辭萊蕪向京國我買犝犗犁春田平時
酬倡歲三四一旦阻隔成萬里踪跡何由問雪鴻
尺書無處尋河鯉豈知乘傳臨廣州抗旌五馬五
驂驪軍中視政並大帥兵事執法如山丘官閣擁
書當南面玉軸牙籤手繙遍熊巖秘笈世上無脉

望神仙字誰見草堂日出初到林柴門早起聞車
音恒情交態畧丘壑惟君重比雙南金明夸于飛
却垂翼自笑長風奮無力強斲珊瑚作釣竿逢君
爲我三太息嗚呼丈夫生世爲人豪立身霄漢秋
雲高肝血可以奉天子安能從事卑下飲啄井李
同螿蟮君縮銀黃佩瓊玖不忘芳草詒朋友我亦
離騷一輩人馨香請置君懷袖有蘭九畹蕙百畝

題徐虹亭楓江漁父圖

煙空氣森畫不得秋潮一片吳淞白蘆花歷亂沙
明瑟楓葉暗落江根石洞庭鶯脰浩蕩遊劃波兩

槩蜻蜓舟珊瑚釣竿執在手欲下不下心悠悠漁翁取魚之志遠不論釣絲長與短魚頭戢戢魚尾纂登盤鏤鱠香雲滿風雷忽起天地春巨魚張鬣開金鱗君不見漁翁釣向龍池津

飲循州署樓答王南邨太守

高樓四望何快哉江帆千扇城頭開石梁鐵橋隔縹緲羅浮天半雲飛來此時離枝味初美蟬鳴江樹涼風起寶坻香醪盛玉瓶珍珠滴出梨河水登臨唱和爲一新觴客難得賢主人取陶丹府養神室白髮變黑無冬春

仙山雲海圖詩和朱德懷太守韻賦贈

有序

太守性寧澹超軼塵宇于署右築西圃畫仙山雲海圖自作長詩屬君山姚君和題畫壁適黃匏齋夫子至邀同翁蘿軒學使張蒼巖郎中顧桐村方鶴洲錢蔗山諸明府馬怡齋進士暨余與陳獻孟茂才各步原韻題冊祝之

歛然壁上來高峯綠厓丹嶂開重重半空彷彿引龍嘯崑崙天矯盤虬松洪濤巨浸遍滄海筆墨一縱煙雲鬆平堆千頃金灑瀨倒挂萬丈青芙蓉坐間几席盡罨畫觀者歎賞爲動容其時太守與嘉

客辨河飛箭無全鋒共言面目似廬岳別指林木
同石淙魚油龍鬪耀貝闕明霞列堞編崇墉詩情
撫景頓颺發密書細字真珠濃譬如昆陽之戰獲
賀勝冰車鐵馬隨相衝玳簾捲起日灑灑錦苔布
處花茸茸唱酬競推陶謝手相過可有求羊蹤桃
花綬映玉麟佩仙人骨相何其丰畫圖山水偶寄
託鬱羅天界誰能逢我欲獨乘潏潏鳥一駕織御
來相從方壺圓嶠在於此何止五嶽四瀆橫心胸

紅蘭主人出示畫冊走筆漫題

天地之初有真宰後人一鑿失其真遂使磅礴少
元氣不畱混沌全精神誰能引手接太始獨自舉
目窮無垠烟雲浩蕩不知處紅蘭果是飛仙人虛
空直乘泱潏鳥晝夜雙駕金銀輪驅染見筆不見
墨筆之所至墨亦勻分明小物具大塊豈有野馬
藏埃塵見画一幅竹二妃無言湘江綠見画一幅
松寒瀑倒挂蒼虬龍見画一幅石江祖魚梁長千
尺亦有一幅獼猴桃堆來馬乳金盤高亦有一幅
木瓜樹香氣招人夢魂去亦有一幅芍藥與牡丹
紅玉金帶香沉檀山梅野菊海棠李大雪凍埋身
不死臙脂瀉出紅泉水

游仙詩

神仙之事非虛無名山到處皆仙都翠袍綠髮得
真汞金鈴火帶存洪爐上清古殿冲虛觀地出朱
陵在天半葛洪弟子黃野人舊廬猶在方壇畔服
丹一粒成地仙龍池灰劫忘歲年日騎啞虎遍巖
谷凌空直上飛雲巔世人蠶絲自已裹納納乾坤
等閒過名姓那畱三朵花日月空隨兩輪磨豈知
洞府繞長春逍遙上界哀下民珊瑚炒藥亦徒爾
木皮作屑能救人明星熒熒風蕭蕭空山無人但
幽獨水流花落總無言嘯聲何事振林木偶着靴
帽使世疑雲中相遇扶搖枝鴻濛拊髀大驚歎神
雀掉頭吾弗知自古鑄金誰不壞見廬我欲燒香
拜觀旁有井號長生濺入廬中滿銀漉

題贈

列仙遊蓬萊金樓複道成週迴羽人住都嶠芝笈
砂牀列分曉何似白水丹梯萬仞峯絕奇琉璃一
碧涵天池爛如銀河見河鼓沐日落月無窮時
祝融之南鍾山東海中日吐珊瑚宮星漢昭灼金
盤紅翠屏千丈流長虹雙松夭矯如虬龍天半竒
窾來清風飄然松下一老翁着如珂雪顏玉童骨

青髓綠還方瞳江心桃竹爲孤筇意與霜鶴凌秋
空髣髴仙降蓬萊峯一翁坐石神奕奕手執如意
自揮斥華簪戴就芙蓉冠翠袍點得蜻蜓色顧盼
雖然在咫尺行藏竟欲週八極提籃老翁更可羨
滿地兒孫眼前見籃裏靈芝葉九莖背上蒲團雲
一片採藥羅浮事修鍊洪崖浮丘日歡宴愛君五
福在一身三人祿命成一入桑弧蓬矢射天地
上帝降誕非無因萱花苒苒長瓊藥桂樹的的堪車
輪哲兄繡服獬豸新廣文首宿潮陽津有弟文章
復好手璠璣席上人人珍况有良朋日相慶高秋
九月天如鏡入夜微吟置几榻舉杯大醉稱賢聖
百歲從教白髮來重陽取次黃花盛醉君酒爲君
歌南斗天上連銀河金壺虬箭知幾多自從盤古
至今八萬四千歲若不行樂如吾何



卷之三

三

集

